

Visoki predstavnik u Washingtonu na vanrednim razgovorima sa MMF-om

Visoki predstavnik Paddy Ashdown je danas stigao u Washington kako bi se hitno sastao sa predstavnicima Međunarodnog monetarnog fonda (MMF). MMF je zaprijetio povlačenjem kredita iz stand-by aranžmana, u ukupnom iznosu od 100 miliona američkih dolara, ako parlamenti u BiH donesu zakone kojim će se prekoračiti ovogodišnji budžet. Jedan od tih zakona je upućen Parlamentu Federacije, sa ciljem povećanja boračkih naknada. Ovim nacrtom zakona o pravima boraca, ratnih vojnih invalida i porodica poginulih boraca se godišnji javni rashodi povećavaju za 180 miliona KM. U Federaciji nema dovoljno sredstava za pokrivanje tih troškova.

Stav MMF-a je jasan: ako se usvoji ovaj zakon o boračkim naknadama, kredit iz stand-by aranžmana neće biti odobren. Time će se BiH uskratiti pristup trenutno raspoloživim sredstvima. Time će se takođe nanijeti šteta kredibilitetu zemlje kod drugih međunarodnih finansijskih institucija i potencijalnih stranih ulagača. Usvajanje ovog nacrtu zakona o boračkim naknadama dovelo bi do smanjivanja fondova vlade za isplatu državnih službenika, prosvjetnih i zdravstvenih radnika, a isto važi i za isplatu penzija, uključujući i same boračke penzije.

Visoki predstavnik će u Washingtonu razgovarati o mogućim ekonomskim posljedicama za BiH ako se zakon o boračkim naknadama ne povuče iz procedure. Iako shvata da vrijeme ističe, visoki predstavnik će također zatražiti od MMF-a da u cilju rješavanja ovog pitanja produži rok za održavanje konačnih pregovora.

Isto tako, Visoki predstavnik će razgovarati i sa službenicima

američke administracije. Njegov povratak u BiH je planiran za sutra.